

Si Parlamento duna aprobacion ley lo pasa Senado tambe

AWE PARLAMENTO

HULANDES MESTER APROBA

CAMBIO DI STATUUT

ORANJESTAD(AAN) — “Nos ta den ambiente di jubilo”. Esaki a wordo declara ayer tardi pa señor Betico Croes, durante un rueda di prensa via telefon sosteni cu periodistanan na Aruba.

Awemerdia Parlamento esta Tweede Kamer, di Hulanda, lo mester vota ariba e cambianan den Statuut di Reino, cu lo permiti Aruba bandona constelacion Antillano. Mientras aparentemente no tin pro-

blema pa Tweede Kamer acepta e cambio di Statuut e Ministro Hulandes pa Asuntonan Antillano, Jan de Koning, a rechaza e concepcionan pa amandamentonan cu a keda entrega pa e delegacion Arubano. Tur cos ta muestra cu awe Tweede Kamer lo vota na favor di e cambio di Statuut, pero segun e concepto original cu a keda compila.

Esey ta encera cu nan no a acepta e referendum,

cu segun Betico Croes, MEP a sostene despues cu el a keda proponi pa AVP, pero a sabiendas cu probablemente e lo keda rechaza, comoquiera cu referendum no ta hancra den nos leyman.

Tampoco lo yena e fecha pa Status Aparte, segun deseo di e delegacion Arubano. Betico Croes a enfatiza ayera cu esaki no ta pa motibonan di indole politico, pero pa razonnan tecnico

y juridico.

Mes motibo ta haci imposible pa incorpora e conferencia di evaluacion. Pa loke ta trata e conferencia, Gobierno di Hulanda a duna su garantia cu e lo keda teni na consideracion.

Esey ta encera pues cu Hulanda no a bay di acuerdo cu e cambianan cu a keda proponi pa e delegacion di Aruba den e concepto di ley cu ta drenta su fase final di tratamiento



Betico Croes:
jubilo.....

awemerdia.

Despues di e tratamiento den Tweede Kamer, lo ta Eerste Kamer cu lo duna su aprobacion, mientras cu tanto Parlamento Antillano como di Aruba lo mester trata e cambio di Statuut.

Number di independiente cu ta sostene coalicion tambe a wordo menciona

BLOKE ARUBANO A KIBRA AYERA

ORANJESTAD(AAN)— E Bloke Arubano cu a keda forma na Hulanda despues di yegada di e delegacion di Staten di Antillas, ayera a bolbe pasa pa olvido, despues cu problemanan a presenta nan mes.

Si e hecho cu den pasado blokanan nunca a logra sobrebibi, a causa cierto scepticismo enfrente e bloke, ayera esnan cu no a duna e bloke mucho tempo di bida a haya

razon.

Segun Betico Croes a bisa cu un articulo cu a keda publica den De Telegraaf di Diamars, lo a causa susto y esaki a pone aparentemente cu e bloke a kibra.

E articulo lo ta papia di Teror y aparentemente lo ta a base di expresion di señor Mito Croes. No tabata tin mucho claridad den e asunto aki pa medianan di comunicacion.

Di tur forma Betico

Croes a bisa cu e bloke a kibra pa motibo cu Mito Croes, Benny Nisbet y Bob Lopez Henriquez a distancia nan mes.

Esaki ta significa no solamente cu ya no tin Bloke atrobe, pero tambe tin un indicacion mas serio, esta cu e Independiente Bob Lopez Henriquez, tambe a aleja su mes di e posicion di e partido MEP aparentemente. Bob Lopez Henriquez ta forma parti di

e coalicion cu ta sostene Gobierno Central y como Independiente tin e asientto cu ta determinante pa e dos tercera parti den Staten, necesario pa por acepta e cambio di Statuut.

No por a haya informacion ayera si e asunto aki lo bay causa problema pa e coalicion. Betico Croes a bisa cu e tres personanan menciona no kier a sostene e introduccion di fecha. Si esaki ta e caso y

en realidad Bob Lopez Henriquez no sostene e fecha, esaki por significa cu den Staten tampoco e lo duna sosten na esaki, y cu lo no tin dos tercera parti como e mayoria absoluto den Staten pa acepta cambio di Statuut.

Tur esaki ta suposicion comoquiera cu ta unicamente ora e delegacion regresa, o dentro di algun dia, lo haya un vista claro di loka ta pasando na Hulanda.

MINISTRO MANSUR A DEFENDE MONEDA PROPIO PA ARUBA

DEN HAAG—Aruba por lo pronto ta mantene su punto di vista cu despues di introduccion di Status Aparte, e mester yega na su propio moneda.

Sinembargo, segun informenan for di Hulanda ta bisa, no ta muestra cu e moneda lo keda introduci dia Promer di Januari, comoquiera cu esaki no ta wordo considera como e momento ideal pa introduccion di e moneda propio.

E agencia di noticia,

ANP, ta cita Ministro Mansur bisando esaki ayera nochi despues di e debate den Parlamento Hulandes encunto e cambio di Statuut.

Segun Ministro Mansur lo ta dificil pa introduci un moneda propio a termino corto, pa motibo cu ciere di Lago a significa cu un pilar fuerte di economia Arubano a bay perdi.

Ministro Mansur, sinembargo, a expresa e speranza cu e economia di Aruba den algun tempo lo

ta basta fuerte pa por introduci un moneda propio.

E gastonan pa introduccion di e Moneda Arubano lo ta alrededor di mey millon florin, segun Ministro Mansur, cu a muestra cu Aruba lo mester carga e gastonan.

Aunke den Parlamento ta existi objeccion serio contra e moneda propio di Aruba, Ministro Mansur a bisa Aruba tin e derecho di tin su propio moneda despues cu Status Aparte

drenta na vigor. Hulanda sin embargo no

tin intencion di participa den e gastonan.

BETICO CROES TA BIN ARUBA PA ALGUN DIA

ORANJESTAD(AAN)— Diadomingo Betico Croes lo viaja pa Aruba, caminda e lo keda algun dia pa sostene conversacion cu funcionarionan di e Fondo Internacional Monetario.

Decisionnan grandi lo mester cay durante e encuentronan cu lo tuma lugar entre dianan 10 y 14 y segun Betico Croes e

propio Ministro di Asuntonan Antillano de Koning, lo a sugeri pa e bini Aruba, atende e funcionarionan di IMF y despues regresa Hulanda.

Gobierno Hulandes lo ta dispuesto pa duna tur yudanza, pero bao di condicionnan cu e fondo lo estipula.